



## Universitätsbibliothek Paderborn

**R. P. Cornelii Hazart Societatis Iesv Theologi Discursus  
Morales In Selectiora Loca Genesis, Exodi, Levitici,  
Numerorum**

**Hazart, Cornelius**

**Antverpiæ, 1688**

Discvrsvs XI. Conjiciuntur duo nobiles in carcerem, & Ioseph illis ministrat.

[urn:nbn:de:hbz:466:1-52700](#)

qui dicebat Iosepho: Tu carceri præteris, sed & ego tibi: Tu vincetos observabis, sed ego te observabo.

## DISCURSUS XI.

*Conjiciuntur duo nobiles in carcerem, & Ioseph illis ministrat.*

**I**nterea dum Ioseph captivorum curam sedulo gereret, accidit, inquit Scriptura, ut peccarent duo Eunuchi, pincerna regis Ægypti, & Pistor, Domino suo: Iratusque contra eos Pharaon, misit eos in carcerem, in quo erat vincitus & Ioseph: At custos carceris tradidit eos Ioseph, qui & ministrabat eis.

Primo, inquit Moyses: Hi duo peccaverunt: Si queris quid commiserint? respondeo: peccaverunt. Non hoc, inquires, querere, sed, quod fuerit illorum flagitium? ait peccaverunt. Una causa ista sufficit apud Magnates, peccaverunt: Aliud nec dici potest, nec queri: Si secreta magnatum explores, & petas de vincitibus, uno verbo omnium illorum acta intelliges: Peccaverunt, & hoc sæpè significat, non peccarunt: Dicuntur ergo hi duo nobiles primo die quo in carcerem conjecti sunt, peccavisse, antequam de illis actum erat in judicio, aut de ullo crimine in particulari accusati, hoc sat est, peccaverunt: Quid peccaverunt? hoccine de illis dicitur, antequam ullus testis accessit, antequam vocati in jus & antequam sit habita quaestio, post judicium pronuntiari debet delictum, hic judicium antecedit, diciturque de miseriis ante cognitam causam, peccaverunt: Nullus tam innocens qui sic condemnari non possit,

Sic Cayphas, antequam rogaret sententias Sacerdotum, Christum reum pronuntiavit: Audistis blasphemiam, inquit, quid adhuc egemus testibus? mox omnium consensu damnatur ad mortem. Sed pergamus.

Dicit Moyses 2. Iratusque contra eos Pharaon (nam alter pincernis præterat, alter pistoribus) misit eos in carcerem.

Quare tam iratus? non tantum quia peccaverunt, ut audivimus Moysen modo dicentem, sed quia principes erant qui peccaverant, unus enim, inquit Moyses, erat præfectus pincernarum, alter pistorum. Tanto enim majus delictum erat, quo majores erant qui peccaverant: Peccatum civis apud Pharaonem, crimen est, sed crimen Praefectorum, flagitium; Sic Vapor in palude fumus est, in ære est fulgur.

Alios

Alios hodieque sàpè videmus mores agendi, prorsus diversos à moribus Pharaonis. Apostemata enim magnorum fædissima pro nœvis habentur, papulae vero vulgi pro cancro, ideoque igne uruntur & secantur novacula.

Non ita edocti sumus in Academia humani corporis, ubi unguis exicantur nullo manuum periculo, & summo discrimine ferrum membris admovetur: Imo cum post plagas enormes, sàpè vivamus, si cor vel acu pungatur, interimus. Magnates cor sunt recipublicæ. Superioris quisque in suo: Lethalia proinde sunt quæcumque illi committunt, quæ forte parvi momenti essent in plebe.

Quid levius quam censere populum, & catalogum subiectorum, tamen quod in civi pro vanitate reputaretur, in Davide punitum fuit strage multorum millium hominum: Adeo magnatum fædiores maculae sunt, & graviora peccata, quam inferiorum. Ut quid ergo dissimilatur cum flagitiis magnorum, quandoquidem vestis illorum byssina, aut divitiae, aut dignitates illa non tegant, sed magis faciant eminere reddantque suo fulgore tetrica.

Jure irascitur Pharaon, & sicut in duos Eunuchos, non tam quia peccaverant, sed quia peccaverant cum principes essent, qui ceteris debuerant bono præaire exemplo. Crescit cum granditate personæ granditas criminis.

Princeps civitatis Sichem vi opprescerat virginem, Rex Ægypti cripuerat Abrahamo uxorem, nec tamen illam attigerat. Primus non legitur ab ipsomet Deo punitus: Alter, inquit Scriptura Gen. cap. 12, flagellatus fuit à Domino plagiis maximis, cum tota sua domo. Gravius puniebat Deus majorem, Rex enim dominabatur vasto & ampio imperio, alter vero scilicet Princeps Sichem vix parvo opidulo. Videant ergo illi qui aliis imperant quid agant: In plena luce sunt, sicuti ergo etiam atomi videntur in sole, sic etiam in illis minima vitia observantur.

3. Dicit Moyses, quod illos duos nobiles conjecerit in carcerem, quia peccaverant contra Dominum suum.

Quam felix fuisset Ægyptus, si passim ita puniti à Rege fuissent qui peccabant in Deum, sicuti illi qui peccabant in regem; ne lixiam quidem ab illo damnatum legimus, quod contra religionem aut Deum peccasset. Et nos in furias agimur si quis objiciat vilitatem familie, si vero Deum vilipendi videmus, etiam interdum ridemus: Irascimur si nos quispiam injurioso verbo appelle, & non

semel movemur, si quis Deum blasphemet. Vociferamur, & debachamur si servus aliquis suo desit officio, & non semel os aperimus si quis peccet contra cultum Dei. Hinc tandem eo deuentum est ut politia præposita fuerit religioni, & divina cedere debuerint humanis.

4. Dicit *Moses* quod illi duo nobiles missi fuerint in carcerem in quo erat vincitus & *Ioseph*, & quod illis ministrabat.

Quomodo vincitus ibi dicitur *Ioseph*, ubi vincitis præterat, & omnium vincitorum curam gerebat? Existimo sanctissimū adolescentem non tantum miserias carceris patienter tulisse, sed etiā sub vesperam pedicas induisse, seque vinciri, cæterorum reorum more iussisse: Imo puto, sic illum de die cæteris ministralle, ut catenam vel traheret, vel circumferret ad cingulum. Misertus enim aliorum nobebat ostentatione libertatis suæ, illorum catenas graviores facere, vult catenatus incedere ne à sociis dissentiret.

Cum ergo duo illi nobiles carcerem intrassent, statim *Ioseph* ministrabat illis: Videbat illos ex sua illustri conditione perturbatos, & memor unde ipsemet excidisset, expertus in se quid esset ex magna felicitate decidisse in magnas miserias, misertus illorum, non explodebat, non irritabat illos, non improperabat illis, sed ministrabat eis cum omni benignitate.

Nam ut *Sophocles* ait: Qui miserias experti sunt, hi soli verum ex aliorum afflictionibus dolorem capiunt. Sic cum *Aeneas* per multas tempestates, pericula, & naufragia venisset ad *Didonem Reginam Tyri*: Illa audiens vidensque ejus miserias, summa illum cum humanitate & affectu exceptit atque tractavit, dicens: Non ignoramus malum, miseris succurrere disco. Ego quoque plurima passa sum, scio quid sit esse miserum; ideo tanto magis misereor tui.

*Compaf-  
fio.*

Et hæc non postrema rationum est, cur Deus nos sinat in miserias labi, ut alter alterius ferre dolores discat: Qui paupertatem expertus est, facilius pauperum miseretur, iisque succurrit: Qui saepius ægrotavit, citius ægrorum misericordia commovetur: Qui re ipsa didicit quid sit contemni, & esse in luctu, statim benigno oculo animoque aspicit luctuosos, & abjectos. Qui semel bonorum jactaram fecit, supra cæteros illius miseret super quem eadem forsvenit.

Volebat olim Deus *Exodi* cap. 22. docere filios *Israël* ut benè haberent advenas, & alienigenas: Advenam, inquit, non contristabis, neque affliges eum, advenæ enim & ipsi fuisti in terra *Egypti*. Vesta

VOS



vos experientia docebit quā miseranda fors sit, vivere captivum, & servum, laboribus oppressum in terra aliena; quare non multis verbis opus est ut vos doceam adhorterque ut similiū miscreamini, vos ipsos tantum aspicite, & mementote quid aliquando fueritis.

Putat etiam D. Leo quod Deus tam graviter labi permiserit D. Petrum Apostolum, ut postea, accedentes ad se peccatores, memor infirmitatis propriæ, cum misericordia ac suavitate admitteret, absolveretque: Erat enim naturā servidus & severus, non poterat fervor ille ac severitas erga alios melius temperari quam perspectā propriā sua infirmitate & lapsū.

Imo D. Paulus Hebr. cap. 4. ipfummet Christum nobis in exemplum proponit, dicens: Non habemus Pontificem qui non posset compati infirmitibus nostris, tentatum autem per omnia. Adeamus ergo cum fiducia ad thronum gratiae ut misericordiam consequamur. Hinc fit ē contrario ut nulli magis duri & immisericordes sint erga miseros quam qui numquam miseras sunt experti.

Tam crudelis erat dives Epulo erga pauperem Lazarum, ut nec micas quidem cadentes de mensa vellet illi dari videbat illum ante fores jacentem in terra, non movebatur: Videbat à capite ad calcem ulceribus plenum, non movebatur, videbat fame pereuntem, non movebatur: Audiebat illum ingemiscerem & ejulantem, non movebatur, audiebat clamantem, ut saltem micas mensæ illi præberet, non movebatur. Quid mirum? numquam expertus fuerat quid esset in nuda humo jacere, cubabat enim semper in molli strato, serica inter stragula, byssinasque cortynas: Numquam expertus erat quid esset incommoda nuditatis tolerare, semper enim pretiosis purpureisque vestimentis incesserat: Numquam expertus fuerat quid esset esse in luctu, semper enim musicæ voces, & instrumenta auribus ejus insonuerant: Numquam expertus fuerat quid esset famem pati, epulabatur enim quotidie splendide. Quomodo poterat talis homo miseri compati?

Aliud nobis exemplum proponit Ieremias Propheta cap. 48. ubi Moabit desribit Fertilis, inquit fuit Moab ab adolescentia sua &c. Semper versati fuerāt in rerum omniū abundantia, hoc unum sciebant, bibere, ineibriari, jocari, ludere, omni voluptatum generi vacare: Idcirco tam erant immisericordes & barbari erga miseros, ut Propheta dicat: Bibebeant viñū in phialis, optimo unguento delibuti, interea videbant filios Israel perire miseriis, & nihil, inquit Propheta, patiebantur super

70  
contritiones Ioseph. Quapropter non miror quod Ioseph tam particu-  
lariter ministraret duobus illis captivis nobilibus, quia eandem ip-  
se fortunam expertus fuerat quam jam ipsi subibant, à summo de-  
iectus ad imum.

Denique hic oculis spectamus, quid sit mundus, ejusque felicitas,  
ac prosperitas. Habemus hictres detrusos inter miserias carceris:  
Quales illi fuerant? Ioseph fuerat oeconomicus Putiphari, ducis exer-  
citus, & nobilissimæ amplissimæque familiae: Alter fuerat Princeps pincernarum, tertius pistorum, in aula regis Ægypti; multa sin-  
guli valebant gratiâ apud Dominos suos. Tota hæc felicitas in mo-  
mento evanuit. Heri in palatio, hodie in ergastulo: ob quam cau-  
sam? vel ob nullam, vel ob tam levem ut pudeat dicere. Ioseph ob  
nullam, dicit enim: *Ego hic innocens in lacum missus sum, & verum di-  
cebat.* Princeps pistorum, ut aiunt Rabbini, propter araneam in-  
ventam in pane qui regiæ mensæ imposituſ erat; Princeps pincernarum propter muscam inventam in craterè quem regi porrige-  
bat ad mensam. Hæc quidem fabula est, non malè tamen excogi-  
tata, ut ostendatur quam ab exigua re dependeat humana felicitas.

*Felicitas  
humana  
dependet  
à mini-  
mo.*

Verius hoc Deus ostendit Daniel cap. 4. Nabuchodonosori regi, quan-  
do illi in somnis objecit arborem magnitudine ac pulchritudine  
admirandam: *Altitudine tangebat cœlum, aspectus illius erat usque ad ter-  
minos universæ terre: Folia ejus pulcherrima, & fructus ejus nimius, &  
resca universorum in ea: Subter eam habitabant animalia & bestie, & in  
ramis ejus conversabantur volucres cali, & ex ea vescebatur omnis caro.  
Simil tamen auditus est clamor: Succidite arborem, & præcidite ramos  
ejus, excutite folia ejus, & dispergite fructus ejus: Fugiant bestia que subter  
eam sunt, & volucres de ramis ejus.*

Huic arbori similis est favor humanus: In altum evehit usque ad  
nubes, à nemine non expetitur, fructus illius videntur dulcissimi,  
omnes concurrunt, omnes ibi latere volunt: At subita ex alto  
venit procella, quæ ramos hujus arboris frangit, fructus dispergit,  
homines sub ea latentes expellit. Jam oculos convertite ad illos  
tres captivos, Iosephum, Principem pistorum & pincernarum: om-  
nes valebant gratia apud Dominos, omnes illorum gratiam am-  
biebant, jam arbor illa excisa est, & jacent prostrati, vinculis inne-  
xi, favore destituti, sententiam cum timore expectant, & nemo est  
qui illos respiciebat.

Optime monet David Psal. 36. *Noli emulari in eo qui prosperatur in  
via*

*vias*: Mundi enim prosperitas ac felicitas, qua multis annis collecta fuit, momento saepè amittitur; gratia enim & favor humanus, magno labore acquiritur, celerrime perditur: Hodie in folio, cras in luto. Quotiescumque fortuna ridet; expectanda sunt lachrymæ: Nam innumera haec tenus toto orbe, & omnibus saeculis fuere exempla, quæ nos docent, quod illa homines in altum evchat, ut dejiciat, juxta illud Poëtæ: *Tolluntur in altum, ut lapsu graviore ruant.* Sic naves dum secundo vento feruntur per aquora, subito vertit ventus, momento ingruit tempestas, & sorbentur ubi luserunt.

Audiamus Senecam lib. de tranquil. cap. 11. *Quæ sunt divitiae, inquit, quæs egestas à tergo non sequatur?* & quamvis non omnes semper invadat, sequitur tamen ut det ultimum iustum, si forte aliqua occasio sece obtulerit: Numquid de facto *Iobum* ditissimum principem è folio deturbavit in finum?

Pergit Seneca: *Quæ dignitas, quam sordes & extrema contemptio, non comitentur?* Numquid *Belizarium* duccm supremum Romani exercitus, innumeris victoriis clarum eo dejicit fortuna ut publicè cogetur sedere ad portas urbis ad mendicandum?

Pergit Seneca: Locuples es? inquit, numquid dñior Pompejus cum tot flumina possideret, fame ac siti periit in palatio cognati. Summis honoribus functus es? numquid tam magnis ut *Sejanus*? Quo die illum Senatus in triumpho deduxerat, populus in frusta divisi. Ita Seneca. Ego vero quid dicam de *Gilimere Wandalorum* Rege, qui vix & vincitus cum uxore, liberis, totaque familia Regia, à *Ioviniano* Imperatore ductus est in triumphum inter mille injurias, & opprobria populi? Quid de *Bajazeth Turcarum* Imperatore, qui prælio vix & captus, ferreaque inclusus caveæ, tergum quotidie præbere debebat victori suo currum ascendi, ejusque sub mensa, canis instar, comedere quæ illi projiciebantur? quid dicam de *Amano*, qui primus à rege, totiusque Persie potentissimus Princeps, suspenitus est in patibulo? quid de *Nabuchodonosore* qui dejectus è throno, expulsus fuit in silvas vixturus inter bestias? quid denique, (numquam enim esset finis) de Comite *Italo Hugolino*, qui ad tantum bonorum omnium fastigium ascenderat, ut fortuna omnes suas opes in ejus familiam effudisse videretur, adeo ut die suo natali cum convivium splendidissimum instruxisset, super mensam ausus fuerit petere: Quid sibi ad omniprem felicitatem defecit? unus è convivis blande illi respondit: *Proximi vicini sunt felicitas*

DISCURSUS MORALES IN

72 felicitas & infelicitas : Haud multo post fortunatissimus ille Comes, una cum liberis capit, turri includitur, fame necatur.

Clamabat olim Poëta ad formosum adolescentem : *O Formose puer! nimium ne fide colori: flos est qui eodem sœpè die flaccescit quo natus est, bullæ est quæ varios ab aëre trahit calores, & unico habitu crepat, & diffatetur in aera ; non minus fragilis est fortuna, in hoc colore formæ fragilior, quod ille sola passim senectute auferatur, hanc vero innumeri vere quotidie casus possint eripere.*

Propterea cum Philippus Macedonum Rex multos uno die lœtos faustosque nuntios de rerum suarum successu accepisset, rem habens suspectam, exclamavit : *O Fortuna, pro tot tantisque bonis parvum aliquid malum retribue: Putabat enim tot prosperos successus, aliquo casu sinistro temperandos, ne fortuna tota simul, ac momento, se in contrariam plane verteret partem.*

DISCURSUS XII.

*Princeps Pincernarum & Pistorum, uterque somnium vident  
in carcere.*

**A**liquantulum, inquit Scriptura, temporis fluxerat, & illi in custodia tenebantur, videruntque ambo somnium nocte una.

Notandum hic ante omnia, triplex esse somniorum genus, nempe, à Deo, à dæmone, à Natura. Valde difficile est asseQUI quænam à Deo sint, quænam à dæmone : Naturalia vero somnia plerunque patent per se, proveniunt enim vel à cogitationibus diurnis, vel à diversâ corporis constitutione.

Homo sanguineus, volucres, musicam, convivia, & loca amæna somniat, subinde per aërem volat, tripudiat, ridet, signum bonæ constitutionis: Iracundi, cædes, verbera, flamas, & ignes somniant: Phlegmatici aquas somniant, navigant, natant, profiscuntur per pluvias &c. melancholici plerunque tristia & horrida somniant, morbos, mortem, funera, sepulchra, arduas vias in quibus non inveniunt exitum, cadunt in foveas, fugiunt se per sequentes &c.

Si quis jam querat ex me an ex somniis quidpiam conjectare possimus? Respondeo, ex naturalibus licet conjectare de valetudine